

# KERWEREDE 2015

## Eileidung un Hallo (Roland)

Hallo Ihr Leid un Kerwegeschd  
schee das ihr uns net vergesst

Die meischde vun eich die wisse Bescheid  
Sonntag noch em Umzug is Läschderzeit

Un wie immer in some kleene Kaff  
hot de end oder de anner domit schon sei schaff

Unser Ufgab die is es dann defier zu Sorge  
das es eich a kummt zu Ohre

Un ens des saa ich eich  
a Drohung koche uns net weich

Drum Eichern nems Digdiergerät schon in die Hand  
später kummt de familiäre Flächebrandt

Den die „unfähisch Generation“ die schreit no Rache  
so ham dann alle was zu lache

Un immer wann e Thema gelese is  
kummt de Kerweschrei des is gewiss

Drum nemt zur Übung mo die Händ jetzt ausem Sack  
un kreischt mol alle laut mit - aber Zack

Die Asslemer Kerwe Sie lebe...

Des habt ehr aber schon bedeutend besser higebracht  
also gebt nochher bitte besser acht

Alkohol sagt mer nooch der dud enthemme  
also quarkt net rum wie alde Memme

Jetzte nemmt en Schluck Schorle fer die Stimm  
un gebt eich dem Kerweschrei nochmo hin

Die Asslemer Kerwe Sie lebe...

Sooo, nachdem des jetzt so halbwegs geht mit eierm Ton  
kummt mol schnell de Mike ans Mikrofon

## Komitee Oh weh (Mike)

Als Neuling bei dem Haufe  
musst ich mer schon die Hoor als raufe

ich dacht die letschde Woch do laft was verkehrt  
„Du lieschd mim Markus die Kerwered“ ham die mer do erklärd

Erschd dacht ich an en schlechte Witz  
oder liegts an de aktuelle Hitz

Doch schnell war mer dann klar  
Scheiße, jetzt bin ich werklich draa

A de Markus wurd jetzt recht schnell blass  
„jetzt hert mer uff, des is keen Spass“

Aber wie immer bei dem Verein  
die akzeptiere halt kee „NEIN“

Drum stehn mir dolle heit do obbe an de Front  
en annere hät des sicher a gekonnt

Ach de Michael der is neu im Haus  
doch der ist fer heit nadirlich raus

Mitglieder kumme, Mitglieder gehen  
es is net werklich immer scheen

E Paar hot uns leider ach verlosse  
do hammer e paar Träne vergosse

Hendrik und Meli Euch sei hier gedankt  
fer eier immer helfend Hand

Im ledschde Johr war des unser Ding  
muss ins Verließ jetzt endlich Ordnung rin

Fer de Moment war des a gelunge  
noch de Hütt war der ganze Glanz verkumme

Jetzt sahs wider aus wie Sau  
die Elfriede macht zu Recht Radau

Um die Scholegläser zu benutze  
muschd de Bart dene Dinger erschd mol stutze

Ach die Zewarolle vun de Hütt

habe so mansche Maus verzückt

Un damit die uns net verlosse  
hammer uff em Bode Traubesaft vergosse

Mitte drin do stand aus Holz des halbe Battebihl  
des war die Deko vum Wache, die war dann halt zuviel

In Asslem hammer jo schon genug verkackt  
jetzt hammer de Beweis das mer des a auswärts packt

Den is des KKA mol außer Haus  
nimmt a do des Chaos seinen Lauf

A in Bockrum uff de Kerb war mer debei  
un hatte unsern Spass mit de Polizei

De Umzug war rum de Hemweg ogetrete  
do hot uns so en griner Kerl mit Mütz zum Ohalde gebete

Mitte im Dorf, beim gröschde Verkehr  
muss der Cop uns zeige „ich bin hald wer“

Der kleinschte Viehtransporter hot die Stroß noch Monsem blockiert  
un in Richtung Asslem hot der uns jo grad rasiert.

Beim Thema kleinschte Viehtransporter, ihr wisssd was ich meine  
vorn die Bulle, hinne die arme Schweine

Egal, die Gass war dicht in Bockrum war Stau  
un unne uff de Gass steht der Kerl un blost sich uff die ....Figur!

Mer wäre viel zu viele uff de Roll un des wär so net erlaubt  
sacht der Sack und hot sich vor uns uffgebaut

Mim Hendrik warer glei per Du  
man wirft sich nette Name zu

Die müsse sich a schon länger kenne  
so wie die sich gegeseidisch nenne

Die Freunschaft hot sich so schnell weiderentwickelt  
do wurd sogar schon ums mitfahre im Bolizeiaudo gefrickelt

Der Klügere gibt nach ham mir uns dann gedacht  
un ham die Biege mim Roland seim Sharan gemacht

Nur de Unverbesserliche blieb uff de Roll

un keener wusst was des jetzt soll

Bis an die Hesselbrick hot der uns verfolgt  
ob der doch vum Hendrik noch was wollt?

Versteckt zwische Sonneschirm und Weinkartons wer hätte das gedacht  
hammer de Dominik doch uff de Roll no Asslem gebracht

Egal, mer ham en geleimt un er hot nix gefunne  
sunscht hätter bestimmt a de Dominik mitgenomme

Drum mein lieber Cop loss der vun mer saage  
mit so ner Willkür kannschd der nur selber schade

Ein Hoch auf unsre Leit vum Ordnungsamt die gehen net iber Leiche  
die versuche mit Gespräche die Mensche zu erreiche

Als nägschdes kummt de Masa zum Rednerpult  
damit der a sein Part absput

Die Asslemer Kerwe Sie lebe...

Tja de Masa hätt jetzt solle hier obe stehn  
der hot uns hängelosse, des is net scheen

Des Fladdern war zu stark in seine Hose  
drum hot de Mut den schnell verlosse

Als Springer bin ich jetzt a schun wieder hier  
un les eich vor vun dem Pabier

**Hurra, hurra de Guido der is dra (geplant Markus,  
verlesen Roland)**

Politik is net wirklich unser Ding  
doch die Geschichte muss hier uff jeden Fall rin

Kerz vor die letschde Kerwe wurd de Ortsvorsteher gewählt  
und a mir ham fleisich mitgezählt

Wer packts, wer kummt noch em Dieter in des Amt?  
irgedwann war klar de Guido Trump der hebt die Hand

Mir finne des alle ziemlich gut  
weil immer wenn sich in Asslem ebbes dud

Steht de Guido in de erschde Rei  
un ist stets mit Feuereifer beim Hilfe debei

Seniorenachmittag, Dorfangerfescht und Maifeier  
de Guido is immer do un schafft ohne groß geseier

De erschde große Ufftritt ho er bei de Kerwe gehabt  
un mer hammen beim Zittern un Schwitze ertappt

Die Menschemasse haben den iritiert  
der hätt wohl lieber Tisch un Bänk flankiert

Es is halt en Unnerschied wie Dag un Nacht  
wann mer so was net so oft macht

Inzwische is er do routiniert un abgezockt  
des kann mer sehe wann er die Bürgersprechstund rockt

A die hot er fer uns alle eigeführt  
damit er mitbekummt was des Volk berührt

Vorher war des hier nie bekannt  
der alde Ortsvorsteher is immer nur mim Fahrrad durch die Prärie gerannt

Bürgernähe is jetzt mehr als nur Gebabbel  
de Guido guckt jedem mit me Oliege uff de Schnabbel

Edel sei der Mensch, hilfreich un gut  
manchmol kocht in uns dennoch die Wut

Kerwe 2014 de Umzug rollt an mir vorbei  
de Guido als Ortsvorsteher is net dabei

Die Parteigenosse Wagner und Tisch hamm sich gedacht  
das die Weingräfin Sophie nur fer sie lacht

In de Kutsch bei der hübsche Frau ham die gesesse  
unsern Ortschef Trump ham die zwee glatt vegesse

Winke un schmeise Gutzel ins weite Rund  
de Guido steht sich derweil die Hacke wund

Drum gehert de Guido vun dene zwee mol eigelade  
um die Schmach vum Vorjohr zu begrabe

Wir als Überbringer stellen uns dann  
im gude Glaube a mol bei eich an

Da des Thema Politik uns heit noch begleitet  
wird beim Guido de Schluss jetzt eingeleitet

Guido bleib wie de bischd und mach so wieder  
dann sinn viele Wähler froh un heider

Die Asslemer Kerwe Sie lebe...

### **Ich will, ich will – aber net zuviel (Mike)**

A bei uns gebts politisches Geplänkel  
nur des ist so klasse des erzählt ihr noch eire Enkel

Stelld eich vor es werd gewählt  
un ver manchen nur de Sieg dann zähl

Stadtrat, Ortsbeirat iberall misse die dezu  
wichtig is scheins hauptsach nix zu du

Drum werd alles gemacht um zu gewinne  
als wers es höchsche Ziel - die spinne!

De Eend den siech hier nirgendwu  
der macht als gehert der net dezu

Egal was grad im Dorf bassiert  
des hot dem wohl noch nie bressiert

Kerwe, Maifeier, Dorfangerfescht  
der gehert do nie zu de owesende Gäscht

Um so schlimmer war es dann  
der kummt do werklich als Ortsbeirat dran

Was soll der dann fer uns bewege  
der dud lieber im Stadtrat sei Klüngelclübscher pflege

Der is doch nie am Zahn der Zeit  
der geht jo gar net unner Leit

Mer wunnern uns noch immer wer den hot gewählt  
fer uns hot do de Eisatz fers Dorf gefehlt

Das es a annerscht geht hot de Roland grad geles  
un glabt mer des mim Guido war keen Käs

Zurick zu unserm Amtsträger der dann nimmer wollt  
e paar Monat später hot er de Arbeit dann Tribut gezollt

„Es dud mer led ich kann des nimmer“

schwubs warer weg vielleicht fer immer

Bei de Stadt un seim Beisitzerposchde fällt em des net ei  
witzischerweis is er do immer noch debei

En zwede vun der Sort hammer noch gewählt  
der hot sei Arbeitszeit wohl a falsch gezählt

A der is unner die Fahneflüchtige gegange  
un hot sei politisches Mandat an de Nagel gehange

Zwische Fenster, Dire un Parkett  
schafft der den polidische Uffwand leider net

Fer de Oberhammer hamm dann die Noochricker gesorgt  
bei de Vereidigung warn die gar net vor Ort

Des war denne net so wischdig do zu sei  
wahrscheinlich fiels ne nur obends nimmi ei

Statt die in ihr Amt zu ibernemme  
konnt de Guido nur noch flenne

Laut Zeitung war net e mol die Hälft vom Ortsbeirat do  
was sin dann des fer Type kam mer do nur fro

Ihr sollt des politische Organ der Wähler sei  
ihr mischd eich fer uns in die wischdische Theme nei

Das ihr domit Verantwortung habt des hanner vorher gewisst  
in Asslem wird sich net verpisst

Un wann er halt so en Bockmischd baut  
de Roland in de Kerwered druff haut

Den wies sich bei unserm Ruf gehert  
mache mer a vor de Politik net kehrt

Ihr habt des Amt gewollt, also macht keen Shit  
macht dann gefällsigschd a die Sitzunge mit

Den mir wern es net vergesse  
un bei de nägschde Wahl uns an eich räche

Die Asslemer Kerwe Sie lebe...

De Markus is immer noch net in Sicht  
aller les ich eich were vor die näxd Geschicht

## Die Jugend vun heit – unfähisch ihr Leit (geplant Markus, verlesen Roland)

Is de Eichern schun vor Ort?  
oder schleicht der sich schun langsam fort

Hier wurd mit Sanktione uns gedroht  
debei mache mer nur Spaß mit seiner Not

Un Eischüchterunge sin fer uns net werklich en Schock  
do griehn mer eher noch mehr Bock

Doch zurick uff null damit ihr wisst  
wer jetzt wenn, un warum hier disst

Stellt eich vor es is Hützeit  
in de nägschde Minute kumme duzend Leit

Also schnell noch des Aggregat betankt  
dann wird uns des in de hektische Phase stets gedankt

Den so muss kener middedrin mol weg  
noch dem Motto „mer misse tanke, oh Schreck“

Bei uns de Dominik is technisch sehr versiert  
der is dann fers Tanke predästiniert

Die letzte Hütt is länger her  
manche Dinge gabs net mehr

A die Dire warn erneuert  
es gab en Eibruch do obe – wie bescheuert

Un am Generatorraum man glaubt es kaum  
die Türklinke no auße schau

Natürlich geht des Ding a selber zu  
der Gaschd will uff de Hütt sei Ruh

De Müller war drin die Tür fällt ins Schloss  
schun rotiert de Stift in seiner Hos

Die Abgase und keen Ausweg zu sieh  
do geht er lieber uff die Knie

Mit de Nas am Lüftungsgitter  
ruft er um Hilfe bis kummt en edle Ritter



Später am Tach gabs e anner Situation  
de Christian vum Eugen kennt des Problem schon

Er kummt um uns zu unnerstitze  
Plötzlich warer im Generatorraum am eisitze

Die Tür war dicht de Christian drin  
aber er griecht des schun selber wieder hin

De Generator macht viel Krach un is zu laut  
trotz Rufe hier kee Sau hinschaut

Kurzerhand wird des Ding dann ausgeschalt  
un de Hilferuf über de Hüttberg jetzt hallt

Nach der Befreiung ging er dann  
un macht sich an des Wiederanstelle dran

Doch was de Christian a probiert  
des Teil is scheinbar stark lädiert

Also de Vader ogebimmelt  
der kummt a glei noch nuff getingelt

Korz denoch kam de Chef der WWG  
so was hot die Welt noch net geseh

Macht de Molly uni s am motze  
mer ham doch gar nix gemacht - es is zum Kotze

Er geht und nimmt des Ding wieder in Betrieb  
was er dann saad is net werkllich lieb

Die „unfähisch Generation“ solls doch lasse  
Dinge wu se kee Ahnung ham noch ozufasse

Nochdem mer dann geklärt ham wenn er domit mähnt  
war der gute sehr beschämt

Kee Wort un keen Muks hot er noch gesproche  
uni s direkt uf de Hemweg uffgebroche

Ob de Christian noch mol geht ans Agregat is net bekannt  
net das em de Eichert haut uff seine Hand

Unserm Dominik sei gesagt  
mer wisse das es an dir nagt

Doch du bischt jo net allee in die Fall gegange  
annre ham a schun drin fescht gehange

Name wern hier nadirlich net genannt  
den de Miro is doch sehr schenant.

De Schreiner Armbruschd hot die Türe repariert  
bestimmt extra, so dass die Kerwered floriert

Also Andy sei dir unsrer Lobeshymne sicher  
du herscht jo a hier gebts viel Gekicher

Un fer die Drohung Eugen, so isses Brauch  
trinke mer uf eich en Schole, Wein pur geht aber auch

Des war die „unfähisch Generation“ mit ihrer Rache  
so hat mer alle was zu lache

Die Asslemer Kerwe Sie lebe...

### **Un jährlich grüßt das Murmeltier – ich wird verrickt des sag ich Dir (Mike)**

Jdes Johr zur Kerwezeit  
wirkt die Jutta alt Ihr Leid

Schwer gezeichnet von de Telefone  
denkt se sicher als ans klone

Der Grund is schnell genannt  
fascht jedem Hof wird nogerannt

Die Daten vom Wein fer die Weiwanerkard  
die Programme der Höfe mo laut, mol zart

Erscht wenn alles do is kanns zum Druck gegebe were  
bis die Jutta aber alles hot is es e ewiges zerre

Mail, SMS, Anrufe und stetiges Bitte  
do schwillt re de Kamm fascht bis zu de...Ohre

Wenn ihr des in 2016 alle friher hibekumme  
wern er vun uns hier in e Dankesrede ufgenomme

Des ganze geht über immer iber Tage un Woche  
wie oft hot die Chefin debei wohl gebroche

Zwische Dag un Dunkel jagt se des dann naus  
un schickts zum Laubi hoch ins Rathaus

Der gebts dann gesammelt an die Presse  
un jeder wes jetzt hier und do kann ich was esse

A musikalisch gebt hier was fer jedermann  
je nach Hof kumme a e paar Musiker ran

Die ähne wolle lieber was zum ruische hocke  
de Rest will ordlich rocke

Doch mer wolle net nur mit unsre Hofbetreiber meckern  
die Spende oschdenisch Woi die dun net kleckern

Des alles kummt eich alle zugut  
den des is unser Ausschankgut

Ohne die Winzer un Höf mit ihre Spende wird des net zu stemme  
mer misse des Kind hier mol beim Name nenne

Drum liebe Winzer habt alle dank  
fer den wundervolle Rebetrank

A beim Birkebämcher hole hatte mer diesmol Hilfe bekomme  
mer ham des dankbar angenumme

Statt wie bisher Stunne im Wald rumzurenne  
schien de Sandro des noch aus seine aktive Zeit zu kenne

No ner Stun warn die were uffem Weg fer hem  
die Jungs warn happy - Zitat: des war scheen

Also a em Sandro ein Lob an dieser Stelle  
griecht er doch sunscht immer nur Schelle

Als nächdes kumme die Asslemer Hexemänner uff de Plan  
die seit e paar Johr mit de Gläser beim Umzug vorn fahrn

Als Verkäufer fer die Weiprobiergläser sin die de Hammer  
unser Vorrat wurd dank dene immer klammer

Dies Johr ham die aber schee geguckt  
em Oli sei Auto hot gar net alle Gläser gschluckt

1032 Gläser wurde nei ageliefert zum Verkauf  
mir ham se ogefeuert „Hexemänner dann macht eich auf“

Un bei dem Wetter, un in unserem Ort  
gebts sicher heit en neie Verkaufrekord

Also lost uns jetzt ens fer die Hexemänner mache  
mer lossen des jetzt fer die mol rischdisch krache

Noch em Schluck Schorle aus meim Glas  
bebt jetzt glei die ganze Gass

Noch dem Zug holt ihr ordendlich Luft  
damit unser Schrei net zu leis verpufft

Ihr Hexemänner des hier is fer eich  
es Asslemer Kerwegekreisch

Die Asslemer Kerwe Sie lebe...

De Markus is als noch net eigetroffe  
vor Angscht hot der sich bestimmt besoffe

### **Das Kerwemotto lebt – in Asslem dann als de Bode bebt (geplant Markus, verlesen Roland)**

”

Ihr liebe Leit, es is werklich wohr  
die Peiner kumme uff unser Kerb seit 30 Jahr“

30 Jahr is e verdammt langi Zeit  
macht eich fer die Zeitreis jetzt bereit

Zuerst wird hier mol benannt  
viele Freundschafte mit 30 Jahr sin uns net bekannt

Drum simmer stolz und mit Herzblut debei  
dummes Geschwätz vun auße is uns einerlei

A was die Peiner hier jedesjahr uff die Gass uns bringe  
jetzt fehlt jo nur noch das die singe

Ansunscht sin die feschk bei uns integriert  
Eröffnung, Weckruf, Umzug un feiern mit uns ganz ungeniert

Stellt eich nur mol vor Kerwesunddach ziemlich frieh  
de Philipp, Dominik, David un de Rest sin ziemlich hie

A die Magnum Sonnenbrille kenne net verstecke  
mir stehe eigentlich alle korz vorm verrecke

Un jetzt misste mir eich wecke gehen  
neee, des will werklich keener sehn

Drum sei de Peiner hier gedankt

die kene spiele a schwer betankt

**NUR WENN DIE STRAMPLER ANGEZOGEN WAREN (die Peiner sind in Babystramplern gelaufen)**

((Un hanner gesehe wie die heit rumgelofe sin  
vielleicht war im Schorle geschdern doch zuviel Wei drin

im Strampelozug Blau un weiß  
fehlt nur noch e Windel voll mit Scheiß

En Schnulli im Mund wer wegem Spiele schiefgegange  
drum hamsen um de Hals gehange

Aber a des ist Peine in Reinkultur  
die ham all e echti Frohnatur

Die kenne a iber sich selber lache  
un mache dann halt mol annre Sache)

Ogefange hat des alles 1985 unnerm Bannert Jockel  
das des so lang gehalde hot haut uns selbst als vum Sockel

Un wenn mer guckt was hier alles rund um die Peiner gelingt  
die Reise hier immer o mit Frau un Kind

A diesjohr is des ganz extrem  
ich glaab ich hab sogar den Klaus gesehn

Net nur die Weingräfin Lichti is hier vor Ort  
a en König, Klaus Barisch König von Peine - ich schmeiß mich fort

Bei Freischieße hot de Klaus de Bock geschosse  
un werd seitdem als König ins Herz geschlosse

A die Anfahrt zu uns is schun en Act  
um 5:30 Uhr Abfahrt in Peine hätte mich eher verschreckt

Doch die springe munder ausem Bus  
und gehe mit uns dann die Eröffnung bis zum Schluss

A hier gibt's Fans in unsre Reihe  
die uns stets ihr Arbeitskraft leihe

De Paul Conrad und die Zimmermann Gerd  
des sind die zwee die mer mit verehrt

Beide helfe immer dann

wann fun uns eigentlich schun keener mer kann

Daher ach eich zwee e großes Kompliment  
oder wie mer überschwengliches Lob heit nennt

A de Thomas Severin is schun johrelang hier zu Gaschd  
un der Kerle, der schafft es faschd

Fer die Peiner Marketing is er fer die Vermarktung da  
un de Euleschnaps is dort wohl net sehr rar

Mit seim Euleschnaps den er uns immer iberreicht  
machter es uns jo net so leicht

Irgendwann misse mer den zusamme an de Kerb mol kippe  
un dann derf der a mol nippe

4 - 5 Flasche hamer schun gebunkert  
un des is jetzt net geflunkert.

Also ihr liebe Peiner an uns werd des sicher net scheitern  
mer kenne uns die nägschde 30 Jahr noch erheitern

Mir sin froh das ihr uns beglückt  
un uns mit eirer Musik jedesmol uffs neue verzückt

Hoch die Gläser un de Schoppe zum Mund  
jetzt geht's fer die Peiner rund

Die Asslemer Kerwe Sie lebe...

### **Ende Aus Vorbei – Jetzt geht's ab zur Feierei (Roland)**

So Markus jetzt kannsche were kumme  
mer ham die Laschd der abgenumme

Des war unseren Rickblick uff unser Neschd  
mer hoffe es war eich alles recht

Dem Mike jetzt bitte en Applaus  
den des sieht vun unne ganz efach aus

Ens liegt uns noch uff de Seele  
des muss ich eich noch schnell verzehle

Mer wurde des Jahr a oft gebete  
uff die Mönchsklause verbal heit eizutrete

Doch wie es sich fer uns gehert  
hatte mer des schun vor dem zeitungartikel mit Ritters geklärt

Do hammer klar gesaat mir finne des net gut  
aber jeder muss halt zu dem stehe was er tut

An de Terminnot kanns net gelege habe  
seit jahrzehnte die Gäsche an dene Tag no Asslem dabbe

Vergebe, vergesse un vorbei  
dewege fange mir net o mit zofferei

Un Neid und Missgunst kenne mir net leide  
sunsch dede mer jo selbst en Stand betreibe

Mir mache des alles fer unser Dorf un unser Fesche  
do un nur dodro halde mir uns fest

So genug mit dem Thema des is arm  
mein Schorle wer mer sunsch ganz warm

Fer heit fühle mir uns geehrt  
ihr steht do unne un habt uns zugehert

Die Umzugsteilnehmer vun Nah und fern  
schee das ihr all do wart – mer ham eich gern

A morge seid ihr alle gern gesehn  
do kennt er zum Schubkerchrenne gehen

es mitmache is eich dann erlaubt  
mit Asslemer Schorle damits net so staubt

Beim Firmelauf denooch wern die Karde a nei gemischt  
damit de Michel mit seine Männer eich net were entwischt

Dienstags beim Mathias is dann Fakt  
do wird die Kerb were eigepackt

Mit Wein und viele Rebegabe  
wird die Kerb dann zu Grabe getrage

Um de Obend auszuklinge wern mer denooch beim Mathias  
noch e bissche singe

Wer dann als noch net genug vun uns hot kann jo kumme  
am 03. Und 4. Oktober sin mer uf de Hütt am brumme

Bis dohin habt hier noch viel Spaß  
in Asslem uff de Kerwe in unser Gass

Die Asslemer Kerwe Sie lebe...